

Ka mahitahi Te Kura Kaupapa Māori o Rotoiti me tāna hapori, tae noa atu ki Te Rūnanga o Ngāti Pikiao

Justin Roberts (Kaitātaki ā-rohe, CORE Education)

Kia ora tātou, ko Justin Roberts tōku ingoa, he kaitātaki ahau mō te Marautanga o Aotearoa ki te rohe o te Waiariki. Kei konei tātou kei te kura kaupapa Māori o Te Rotoiti. Nā, ko tētahi o ngā whaingā nui o te kura nei, he mahi ngātahi me te whānau, me te hapori, me te iwi, me te Rūnanga nui o Ngāti Pikiao ki te āta kokiri i ngā tūmanako a te iwi. Nō reira, nau mai, whakataua mai.

Tammy Gardiner (Tumuaki)

Kia ora rā, ko Tammy Gardiner tōku ingoa. Nō konei, nō te haukāinga. Ko au te tumuaki kairīwhi i tēnei wā i te kura, te kura kaupapa Māori o Te Rotoiti.

Pare Merito (Te Rūnanga o Ngāti Pikiao)

Our biggest aspiration for these children is that they will come out with a, a very strong taha Māori side. That they will succeed in life, and that they will be positive contributors towards our whānau, hapu and iwi.

Ripeka Lessels (Te Poari Whakahaere)

Kia puta atu ngā mokopuna i konei, kia kuhu atu rā rātou ki tō rātou na ake ao, ahakoa tēhea. Ki reira rā, rāweke haere ai, ā, tū marō nei i roto i tērā ao i hiahia nei, e hiahia neitia, e ngākaunuitia ana. Koirā tāku, ahakoa te aha. Kia tū marō nei i roto i tōna ake mana, i tōna ake, i ōna ake hiahia. Kia tū marō anō nei rātou, ki roto i tō rātou ake Ngāti Pikiaotanga.

Pare Merito (Te Rūnanga o Ngāti Pikiao)

One of our key goals is to promote life long learning within Ngāti Pikiao, and from the rūnanga perspective, we're coming in at a, at a macro level in terms of looking at the whole educational journey of our tamariki, from cradle, from birth to death, really.

Ripeka Lessels (Te Poari Whakahaere)

Kei te kaha hoki tēnei whānau te tautoko i ngā tamariki, ahakoa te aha. Ahakoa te hui, ahakoa te kaupapa, haere tonu mai ngā whānau ki te tautoko. He rite tonu ki tēnei kaupapa o te Marautanga o Aotearoa. Kei te mōhio tonu, i mōhio tonu rā mātou o te Poari, ko mātou ngā mea kei waenganui i tēnei mahi, ki te kore mātou o te poari e kaha ki te tōtō haere mai i ngā whānau, a te hapori ki te whakakōrero, ki te hui tahi, ka kore hoki e puta mai he aha, he hua. Ki te kore te poari e kaha ki te tautoko i ngā mahi, i ngā mahi whakakao i te whānau, i ngā mahi e tōtō haere mai ngā whānau, ki te kore te poari e akiaki i te whānau, ka kore pea e puta he whakaaro i te whānau. Ka waiho mai te poari noa iho te kura e whakahaere.

Amokura Whata (Te Poari Whakahaere)

He matakū, i te tīmata he matakū ki te tautoko, tautoko, kōrero. I nāianeī, ka rawe rātou. Ka haramai ki te noho ki te taha o ngā tamariki, o ngā kaiako, ki te taha o ngā tamariki. He tino hiahia mātou mō ngā tamariki, ka eke ki te taumata, i te reo Māori.

Ngawhakawairangi Hohepa (Kuia o te Kura)

Tino wawata kia tino mātatau ngā mokopuna ki te reo me ōna tikanga. Tū atu i tērā kia noho tonu mai te whakaaro Māori i roto i o rātou whatumanawa.

Amokura Whata (Te Poari Whakahaere)

He rite tonu te kaupapa o te kōhanga ki te kura, ko te mea nui mō tātou, te reo Māori mō ngā tamariki, ahakoa te kaupapa, ko ngā rauemi, ko ngā mahi hai tautoko i te reo. He tino, he tino kaupapa tērā mō mātou. Ia wā, ia tau, ka pānui ka tono mātatau ki ngā koroua, kuia, ki te haramai ki te kōhanga, ki te kura nei kai ai, kōrero, waiata.

Ngawhakawairangi Hohepa (Kuia o te kura)

Ka haere mai, haere ana ngā tamariki ki te marae noho ai, kua tonoa mai tētehi tangata e mōhio ana ki ngā hitori o Ngāti Pikiao me ngā wāhi katoa, ngā pāpāringa o te moana me kii. Ana, koia tāna mahi, he kōrero ki ngā tamariki.

Tammy Gardiner (Tumuaki)

Te mea tuatahi me whakawhiti kōrero mātou ko ngā koeke, me hui tahi mātou ko ngā koeke hai pātai atu he aha te mea whakahirahira, mō te haukāinga nei. Kātahi ka titiro me pēhea te here i te Marautanga o Aotearoa ki tēnei mea te marautanga ā-kura, kia noho tahi, kia mahi ngātahi. Te nuinga o ngā mātua i te whakaaro atu hai aha tēnei mea te tuhituhi, me te pangarau, me te putaiao, ko te mea nui ko tō tātou nei reo rangatira. Tuarua, te tū māia, tuatoru, te mea tauiwī hoki, he hiahia hoki o ngā kaiako, a ngā mātua, kia tū manawanui ngā tamariki ki roto i ngā reo e rua, me ngā ao e rua.

Ripeka Lessels (Te Poari Whakahaere)

I hui tahi mātou, e hia kē nei ngā hui i karangahia nei te poari. Whakatakoto mai nei ngā kōrero o tēna whānau, a tēna whānau, a tēna whānau, te hapori. Ko tā te poari mahi ki te whakaemiemi haere i ēna kōrero, ka takoto mai rā, anei ngā kōrero o te whānau nei, me pēhea rā te whakatinana haere i aua mea i roto i tētahi marautanga.

Tammy Gardiner (Tumuaki)

Ko te mea nui, ko ngā wawata o te whānau whānui mai i ngā tamariki tae noa ki ngā koeke, kia puta te akonga mai i te kura, me tū māia ki roto i ngā ao e rua. Ahakoa te mahi, ahakoa kei te aha me tū māia te mea nui. Ka āhei te here ki te Aho Matua me ngā mātāpono o te Aho Matua e pā ana ki tēnei mea te tamaiti me te whakaaro hoki, ko te tamaiti te mea whakahirahira rawa atu. I hui mātou ngā rōpu e rima. I te tuatahi i pātai atu ki ngā tamariki, he aha te āhua pai o te tamaiti ka puta mai i tēnei kura. Kātahi ka pātai atu ki ngā tamariki he aha te āhua o te kaiako pai i tēnei kura. Otirā, he aha te āhuatanga o te tumuaki pai rawa atu, te tumuaki manawanui o te kura nei. He pai te kite o tērā. Kātahi ka pātai atu ki ngā kaiako, kātahi ki ngā mātua, te rōpu mutunga, ko ngā pakeke, me ngā koeke. Tae noa ngā tamariki paku ki ngā koeke ka kitea te whānuitanga o ngā whakaaro rerekē, he mea whakahirahira tērā. Ko te mea nui, he āhua ōrite ngā whakaaro. Ka hoki atu ki tērā mea, te tū māia, te tū manawanui. Nō reira, koina te mea ka kii atu 'i roto i te manawanui'.

Justin Roberts (Kaitātaki ā-rohe, CORE Education)

Ā, ko te mahi nui i naianei ko te whakaoti i te āhuratanga o ā tātou ākonga, mai i korā, ko te kite atu, me pēhea tātou, arā, ko te whānau, te kura, te iwi, me pēhea tātou e tautoko i a tātou anō ki te waihanga i te marautanga ā-kura.